

每週經課朗誦經文(巴克禮漢羅/教羅)2013/05/05

共同經課 - 1 使徒行傳十六章九節~十五節

9 保羅暝時看見異象；有一個馬其頓人 khiā-teh 求伊講，請過來馬其頓幫贊阮。10 保羅已經看見異象，阮 chiah-ê liām-piⁿ 意愛 beh 去馬其頓，掠做是上帝召阮傳福音 hō in。11 所以 tùi Tèk-lô-a 搭船直直到 Sat-mô-tèk-lat，隔日到 Nî-a-pho-lī；12 tùi hia 到腓立比，就是馬其頓 hit-tè 頭一個城，也是羅馬人分設 ê 城：阮 tī chit-ê 城 tiàm kúi-nā 日。13 Tī 安歇日出城門外到河邊，phah 算 tī hia 有祈禱 ê 所在；就坐 teh，kap 所聚集 ê 婦人人談論。14 有一個賣紫色布 ê 婦人人，名 Lū-tí-a，來聽，伊是 Chhui-ngá-chhui-lat 城 ê 人，平素敬拜上帝；主開伊 ê 心，hō伊專 òng 保羅所講 ê 話。15 伊 kap 伊 ê 家已經受洗禮，就求阮，講，若掠我做真實信主 ê 人，請 kah 我 ê 家 toà。就強強留阮。

共同經課 - 2 詩篇六十七篇

1 Chit 篇詩歌，交 hō樂官；用絲絃 ê 樂器。1) 願上帝憐憫阮，賜福阮； Hō伊 ê 面照光阮；[Sè-láh]2 Thang hō 世界知你 ê 道路，萬國中知你 ê 救恩。3 上帝 ah，願列邦 o-ló 你；願列邦 lóng o-ló 你。4 願萬國快樂，出歡喜 ê 聲；因為你 beh 照公道審判列邦；治理地上 ê 萬國。[Sè-láh]5 上帝 ah，願列邦 o-ló 你；願列邦 lóng o-ló 你。6 地已經出土產，上帝，就是阮 ê 上帝，beh 賜福阮。7 上帝 beh 賜福阮；地 ê 四極 lóng beh 敬畏伊。

共同經課 - 3 啟示錄二十一章十節，二十二節~二十二章五節

10 我就受神 ê 感動，hō伊 chhoā 去一座山，大 koh 高，將聖城耶路撒冷，出 tī 天裡，tùi 上帝降落 ê，報我看；22 我無看見城內有殿堂；因為主上帝，全能 ê，kap 羊羔做伊 ê 殿堂。23 城無欠用日 á 是月來照伊；因為上帝 ê 榮光照伊。羊羔做伊 ê 燈。24 列邦 ê 人 beh oá 靠伊 ê 光來行；地上 ê 王 beh 將 in ê 榮光帶來歸 tī 伊。25 城門日時 lóng 無關，(因為 tī hia beh 無暝時)26 人 beh 用列邦 ê 榮光 kap 尊貴帶來歸 tī 伊。27 凡若無清氣 ê 物，以及行可惡白賊 ê 人決斷 boē 得入 hia；只有記 tī 羊羔 ê 活命冊 ê 能得入。1 天使 koh 報我看城內街路中有活命水 ê 河，清亮親像水晶，tùi 上帝 kap 羊羔 ê 座位流出。2 河 ê 雙 pêng 有活命 ê 樹，結十二樣 ê 果子，每月結伊 ê 果子；伊 ê 樹葉做醫治列邦 ê 路用。3 Lóng 無 koh 有咒詛；是上帝 kap 羊羔 ê 座位 beh toà tī hia；4 伊 ê 奴僕 beh 服事伊，也 beh 看見伊 ê 面；koh 伊 ê 名 tī in ê 頭額。5 無 koh 有暝時；也無欠用燈 ê 光 kap 日 ê 光，因為主上帝 beh 照光 in；也 in beh 做王，到代代無盡。

共同經課 - 4 約翰福音十四章二十三節~二十九節

23 耶穌應伊講，人若疼我，伊 beh 守我 ê 道理，我 ê 父 beh 疼伊，阮亦 beh 就近伊，koh kap 伊同 khiā 起。24 無疼我 ê 人，就無守我 chiah-ê 話；koh lín 所聽 ê 道理，m̄是我 ê，就是差我 ê 父 ê。25 我 iáu kap lín toà ê 時，有將 chiah-ê 話 kā lín 講。26 但是保惠師，就是聖神，父 tī 我 ê 名所 beh 差 ê，伊 beh 將一切 ê 事教示 lín，koh beh hō lín 記得我一切所 kā lín 講 ê。27 我用平安留 tehhou⁷ lín；我將我 ê 平安賞賜 lín；我 teh hō lín，m̄是親像世間 teh hō 人 ê 款。Lín ê 心莫得擊腹，亦莫得驚惶。28 Lín 已經聽見我有 kā lín 講，我去，koh 來就近 lín。Lín 若疼我，就因為我歸 tī 父 lín 會歡喜；因為父比我 khah 大。29 Taⁿ 事 iáu-bē 成，我已經 kā lín 講，hō lín tī 事成 ê 時 thang 信。